

欽定剿平粵匪方略

欽定勦平粵匪方略卷四十五 癸丑年

六月初九日 壬午 托明阿西凌阿善祿陸應穀奏

言臣等於初四日齊抵榮澤河口據報溫縣失陷賊匪竄偃懷慶府城隨添調船隻督帶兵勇趕緊過河或分布兜拏或合力攻勦總期滅此羣醜以靖地方惟賊勢旣衆一經大兵攻擊恐由清化闌入晉省應請

飭下山西撫臣加緊截擊遏其去路至逆賊前在汜水
經臣托明阿等痛剿後尙有餘匪竄至密縣臣
陸應穀現聞經文岱柏山已抵汝州當卽飛咨
就近馳往迎擊

托明阿西凌阿善祿陸應穀又奏言探報賊於
初三日竄入密縣初四日竄入新鄭查新鄭距
省一百餘里若乘虛直撲省城所關匪細經文

岱柏山遠在汝州勢不相及臣陸應穀卽督帶
兵勇星夜折回保護省垣臣托明阿仍同善祿
西凌阿迅速渡河攻勦懷慶一路之賊以防北
竄仍一面再催經文岱柏山趕緊折回迎頭截
擊奏入

上命軍機大臣傳諭托明阿西凌阿善祿陸應穀曰逆
匪竄徧懷慶府城餘匪竄入密縣又竄新鄭該處距

省一百餘里陸應穀折回保護省垣托明阿著卽與
西凌阿善祿等趕緊渡河迅赴懷慶會同直隸官兵
併力夾擊毋失事機陸應穀保衛地方仍當相機出
省勦賊勿但株守省垣毫無策應仍著飛催經文岱
柏山趕卽帶兵由汝州折回迎頭截擊五月二十八
九日豐北漫口當此逆燄未平又遭水患百姓流離
失所殊堪憫惻陸應穀務卽督飭地方官遇有災民

入境妥爲安撫勿使逆匪乘閒勾結

十一日甲申張芾奏言查省城西南北各門外民

房牆垣焚燬未盡該逆環踞其中開放槍礮且
暗挖地道攻剿殊難得手臣等與湖北臬司江

忠源商議於五月二十日令楚勇頭目由永和
門空心礮臺突門出隊該逆約三四千人已先
在高坡上開放槍礮楚勇直撲賊隊該逆抵敵

不住退至坡後楚勇站定該逆拌死回撲復被
楚勇擊退往復四次傷斃賊匪約百餘名正相
持閒知府耆齡林福祥都司景星及各將弁督
飭兵勇施放大礮擡槍並經糧道鄧仁堃新築
空心礮臺督飭練勇於臺內連放大礮絡繹不
絕斃賊甚多林福祥復親放連珠火箭並點大
礮轟斃不少該員因礮位退坐致傷骹足各營

奮勇兵丁復下城助戰矢石如雨該逆始全行
敗退先後約共傷斃賊匪二百餘名生擒長髮
賊五名斬獲長髮首級七顆官兵傷亡者幾至
百名臣與臣陳孚恩皆在城上督戰該文武員
弁等均能用命楚勇尤屬奮勇敢戰以一當百
據江忠源稱陣亡把總李光寬身經百戰所向
無前此次打仗身先衆勇深入賊隊中槍身故

集之身圖丁田老口二三
四
深堪憫惜李光寬前經擬保都司應請

旨加恩照都司例賜卹應保之勇長另開清單恭呈

御覽至知府林福祥以文員隨同督戰竟能點放火箭

大礮正中賊隊身受數傷應請

賞換花翎並遇有江省知府缺出請

旨簡放惟是賊鋒稍挫兵力甚單因守孤城日久深虞

他變現在加築月城並鼓勵士卒下城焚屋清

濠以防地道暗攻嚴拏奸細以弭內訌江忠源
忠勤懋勉籌畫周詳營員兵丁無不悅服實屬
禦侮之才未便任其困守一隅仍請

旨速催援兵庶可早日解圍俾該司得以北上至所謂
南贛九江兩鎮兵均尙未到查南贛離省較遠
且各邊界有事皆已分兵防堵輾轉徵調一時
未必能來至九江鎮兵已報起程迄今未到該

總兵未免意存畏葸應請

旨將護九江鎮總兵羅玉斌暫行革職留任仍催令趕
緊赴援再觀後效

張芾又奏言江省兵力單薄實屬不敷戰守疊
咨向榮迅速帶兵應援茲聞有調赴江南大營
之四川兵勇數千名取道湖北路過九江合無
仰懇

天恩俯念江西爲糧臺重地請

旨飛飭四川統兵提鎮迅卽改赴江省以資援剿解圍
後再順流東下又湖南湖北離江最近現聞廣
濟尙有防兵可以就近撥援江西查兩楚兵勇
尙不乏人應請

旨速派三千名來江援剿若得鎮筸兵八百名卽可內
外夾擊滅此賊匪以除大患實於大局有裨

張芾又奏言省城自聞警以來居民紛紛遷徙
皆由官紳先期遠遁以致人心渙散查有南安
府同知楊正祥撫州通判范壽椿饒州通判王
煊宇候補知縣劉世煒祁啟萼等或派稽察城
門或派巡查街道閉城之後均未見面又萬安
縣知縣黃瑞圖峽江縣知縣蔡廷蘭試用知縣
袁思韓並非奉委外出乃屢傳不到顯係先期

遠避若不嚴行懲辦何以勵臣節而服人心應
請

旨將該員楊正祥等卽行革職以憑分別查辦此外候
補正佐各員容俟另行查叅至紳士爲齊民表
率無論籍隸首縣外縣多係奉

旨幫辦團練人員宜如何同心協力共圖守禦乃因寇
氛甚近率皆乘閒遠颺此等情形皆在籍尙書

臣陳孚恩所目擊統俟查明分別請

旨遵辦現在紳士中惟已革臬司徐思莊戶部候補郎
中陳景謨候補主事汪茹鑑隨同臣等督帶練
勇晝夜巡防可否請

旨將徐思莊原革翎頂

加恩賞還俾昭激勸出自

鴻慈奏入

上命軍機大臣傳諭張芾曰南昌省城自被賊匪攻撲以來連日出勦獲勝並防守一切均臻嚴密江忠源所帶練勇尤爲出力張亮基現駐道士汛昨已有旨令其選派鎮將督帶兵勇馳赴救援本日復令駱秉章曾國藩迅調鎮筸鎮兵八百名並令曾國藩將團練得力之楚勇酌派數百名遴委員弁管帶趕赴江西交江忠源帶同攻勦張芾務當會同陳孚恩江忠

源等一面力籌守禦嚴拏奸細暗防地道一面與各路援兵內外夾擊以期一鼓殲除至江省民情素稱懦弱卽紳士等亦不免紛紛遷徙以致人心惶惑惟陳孚恩暨在籍已革臬司徐思莊郎中陳景謨主事汪茹鑑等仍在省城巡防守禦足爲士民矜式徐思莊係已革大員著先賞給六品頂戴以示獎勵至所稱在籍各員或畏賊避匿或聞警遠颺著該撫再行

剴切勸諭並將幫辦團練首先逃避之紳士查明具奏該撫所聞調赴江南大營之四川兵勇敢道九江擬請截留等語此項川兵並未徵調恐係傳聞之誤九江南贛官兵仍卽飛催赴省毋令遲延

上又命軍機大臣傳諭駱秉章曾國藩曰此次南昌省城獲勝多係江忠源所帶楚勇之力惟賊鋒雖已稍挫兵力尙單昨已諭張亮基等撥兵赴援仍須湖南

添派兵勇一同援應駱秉章等調赴省城鎮守永綏等營弁兵共一千六百名著卽於此項兵內抽撥八百名馳赴江西省城並將現募湘鄉等處練勇酌撥壯健者數百名派員管帶星夜前往交江忠源調遣以資守禦江忠源籍隸湖南其勇略素爲鄉人所服委以楚省兵勇定能得力該署撫等其妥速籌之

上諭內閣曰此次文武員弁兵勇人等出城擊賊均能

用命江忠源前在湖南屢著戰功所帶楚勇尤爲奮
勇出力可嘉之至知府林福祥以文員督戰身受數
傷猶復晝夜登陴亦屬奮勉著賞換花翎陣亡之把
總李光寬身先衆勇深入賊隊中槍身死深堪憫惻
加恩著照都司例賜卹以慰忠魂羅玉斌著暫行革
職仍嚴催迅赴省城如再遷延卽著從嚴叅辦

上又諭內閣曰逆匪竄擾南昌經該撫督率文武出城

勦辦該省官員或派稽察城門或派巡查街道乃閉
城之後均未與該撫見面並有未奉差委屢傳不到
者顯係先期遠避若不嚴行懲辦何以肅官守而勵
人心所有南安府同知楊正祥撫州府通判范壽椿
饒州府通判王煊宇候補知縣劉世煒祁啟萼萬安
縣知縣黃瑞圖峽江縣知縣蔡廷蘭試用知縣袁思
韓均著卽行革職交該撫查明畏葸退匿確情嚴叅

治罪

同日琦善奏言六月初一日我兵用炸子礮打
入揚城斃賊多名該逆防守益堅並勾通瓜州
賊匪搶占虹橋又欲勾通江甯鎮江賊匪前赴
浦口由六合旱路向揚州接應臣以爲此時先
須嚴防各路斷賊接應庶不致顧此失彼因咨
會漕臣福濟嚴防東關督飭知府福楫添帶兵

勇協同紳董防守虹橋臣又分飭派防南路官兵嚴扼要隘並商同漕臣先將儀徵停泊舊糧船五隻在三汊河地方墜石沈舟以遏由瓜州上竄水路並飭總兵瞿騰龍馳赴六合協同防堵以備賊匪北竄查賊匪占踞江甯等三城大江爲其所有賊蹤來去自如當此妖氛肆擾兵力不敷通籌全局勢難兼顧臣奉

命在江北攻勦祇可先圖克復揚城然卽以揚城而論
亦有賊衆兵寡之虞況瓜州賊巢近在肘腋江
甯鎮江之賊聲息亦復易通現在函致向榮添
雇艇船於江面截擊以斷賊船之來路一面飛
飭文武各員會同紳士分帶兵勇扼守虹橋使
賊不得應援或可相機收復

琦善又奏言查陳金綬營拏獲奸細朱增發供

係安徽和州人今年二月被賊裹脅授爲僞司
馬嗣又授爲僞百長四月隨同僞正副丞相林
淵詳李開芳吉汝元朱錫琨等由浦口滁州關
山朱龍橋至臨淮關復自臨淮起身走懷遠蒙
城亳州到歸德府攻陷府城旋由甯陵縣睢州
杞縣陳留縣直到汴梁省因城上官兵防範甚
嚴且中隔護城河不能過去遂到朱仙鎮屯集

林鳳詳卽用黃綾寫信二封蓋用僞印一交該犯縫於衣襟一交從逆之揚州人嚴洸導收執令其送往江甯賊匪該犯等由杞縣至睢州與嚴洸導分路時嚴洸導曾言要到揚州仙女廟探親該犯卽由劉家口虞城縣徐州府宿遷縣至清江浦又乘船由寶應縣邵伯鎮行至揚州城西之司徒廟被陳金綬官兵拏獲嚴洸導現

在不知行至何處等供隨於該犯衣襟內拆出賊信驗與所供相符並據該犯供稱賊匪商議如得渡黃卽行北竄如不得渡仍回長沙等語查該犯自朱仙鎮起身時賊匪尙在彼處占踞訊之以後之事不能知曉至嚴洸導既有赴仙女廟探親之說臣雷以誠在萬福橋距仙女廟較近當卽函致迅派兵弁就近查拏又據拏獲

縋城奸細長髮賊王元等供稱揚州城內賊匪
分遣奸細來往勾結恐被盤獲俱令蓄髮詭稱
難民徑赴軍營投誠卽可任意往來並於一賊
身邊搜出木刻篆文圖記據供帶赴瓜州傳送
口信令其前來接應內外夾攻若使別人送信
回揚亦於信上用此圖記等供是此後凡難民
投營者亦難盡信惟北路帶兵各員深恐未悉

情形誤中奸謀合併陳明奏入

上命軍機大臣傳諭琦善陳金綬雷以誠曰朕以琦善才尙可用棄瑕錄取特命督師江北節制諸軍原期一振聲威殲除醜類乃數月以來擁兵邗上收復無期糜餉老師咎將誰諉茲復以妖氛肆擾藉口兵力不敷且云卽以揚城而論亦有賊衆兵寡之虞其將無計可施任賊安踞乎抑待賊全行竄出中原糜爛

而後收復空城以奏功乎現在度支告乏軍餉不濟
大勢實屬可憂是以特加殊諭限於季夏以前全數
掃蕩此朕不得已之苦衷該大臣豈不動於心也總
之迅復揚城惟該大臣之功若日事遷延以致兵驕
將怯皆不用命則該大臣之罪不可追矣罰罪賞功
國法具在勿以疊奉嚴旨視若弁髦也瓜州紳士雖
有挫失幸虹橋未失水路尙有可扼該匪不致任意

往來毫無顧忌該大臣等仍當剴切勸諭紳士義勇協力效忠功成膺賞至於肅清江路以斷賊蹤當與向榮合謀江面艇船與瓜州團練互相策應庶可迅掃妖氛

上又命軍機大臣傳諭訥爾經額恩華托明阿曰琦善奏拏獲鮑城長髮之賊並另獲奸細搜出逆書所獲犯供有賊匪如得渡黃卽圖北竄如不得渡仍回長

沙之說現在賊已過河此種奸細難保不到處窺探
著請爾經額恩華托明阿於駐紮扼要處所各飭兵
勇盤詰奸宄卽有稱難民來歸者亦須詳細查訊萬
不可墮賊奸計再聞北竄之賊所掠資糧有限現乏
米石逆書中所稱紅粉卽係火藥該逆奔竄飄忽斷
無暇製造鉛藥專恃掠取該大臣等嚴飭所屬於糧
餉火藥等項加意防護勿爲賊掠仍當迅速進剿四

路堦圍斷其接濟其被勦必竄之路尤當豫爲布置
嚴密防守

琦善又奏言臣前奉

諭旨發交西凌阿等原摺飭令查奏當卽派員訪察據
稱浦口各村莊居民僉云山東官兵二百名在
浦口上斗岡廟旁紮營黑龍江官兵在浦口民
房零星散住四月初六日賊船到浦口山東官

兵迎賊接仗衆寡不敵且戰且退回至上斗岡
營旁維時黑龍江官兵在江邊麥田放馬賊至
卽棄馬逃回賊卽分撲趕追凡黑龍江官兵住
宿民房全被賊焚該官兵紛紛逃至東葛西葛
各處躲避卽聞有傷亡亦係逃走落後被殺並
非打仗受傷至鍋帳實係四月初三日解到其
頭批解到馬八九百匹各起官兵曾經分領二

批解到馬數百匹該官兵因嫌瘦弱未曾收領
前項馬匹賊來時已經失散迨至滁州地方訪
得四月二十一二等日賊匪由北退至滁州肆
行搶奪山東官兵隨黑龍江官兵後追剿至滁
州朱龍橋與賊相遇黑龍江官兵又欲退走經
山東官兵在後阻止不得不奮力前進是以獲
勝等語至西凌阿等請發箭枝一節查江甯揚

州鎮江三城失守本乏造箭之人爲西凌阿等
所深知乃西凌阿等逃至滁州復不自奮輒向
賊所不至之天長縣紆道來揚請處以爲巧避
之計迨臣不准前來卽將河臣解到戰箭五千
枝全行發給責令跟蹤追賊西凌阿等明知箭
枝無從製造故意屢請添發以爲遷延諉卸地
步至所稱請發糧餉一節其時河南並未解到

集賢堂之附卷四十三
憑何應撥嗣河南餉項解到臣卽分給銀一萬
二千兩交該官兵應用西凌阿等畏罪捏飾無
理曉辯早在

聖明洞鑒之中且在浦口約束無方見賊輒逃爲江浦
滁州紳民所切齒儻蒙

飭下李嘉端呂賢基就近訪查更可得其詳細奏入

上諭內閣曰已革都統西凌阿管帶黑龍江官兵在浦

口散住民房於帳房解到後並不安紮營盤漫無準
備爲賊所襲自應治以應得之罪惟西凌阿現帶黑
龍江官兵在河南勦賊未便令其置身事外西凌阿
著暫緩治罪交托明阿責令該革員帶罪自效儻再
不知奮勉朕惟有執法從事決不寬貸

同日勝保奏言臣於五月十二日自揚州起程
後中途遇雨五日不止臣仍督軍前進不准休

息無如長途泥水過深每日僅行三四十里於
六月初四日抵亳州由陸路兼程前進查亳州
與豫省接壤距汴梁不足四百里如果天氣晴
明四日可到臣已飛咨河南撫臣並署布政使
沈兆澐等若逆賊再犯省垣總宜竭力固守不
出旬日救援必至臣擬由河南鹿邑一帶取道
賊竄處所追擊並咨商托明阿等分路合圍以

期夾擊奏入

上命軍機大臣傳諭勝保曰逆匪已竄偪懷慶府城分
股竄入密縣新鄭勝保現在由河南鹿邑一帶取道
前進著卽探明賊竄處所無論大河南北何路緊要
卽由何路進攻如汴梁喫重亦卽迅速帶兵籌勦總
期併力翦除勿任再有延蔓總兵經文岱柏山係領
兵協勦之員乃遠在汝州疊經巡撫陸應穀催令進

集賢堂
勦膽敢置之不覆顯係避近就遠不遵該撫調度著
勝保嚴密查訪如實有遷延巧避情事卽行從重叅
辦

十二日酉乙刑科給事中張煒奏言竊查賊匪擾

及溫縣武陟等處官兵勦辦猶未得手該處與
山西澤州潞安等府祇隔太行一山北爲山西
直隸交界其入山大路西南有垣曲縣之會興

鎮正南有懷慶府之清化鎮東南有壺關縣之
窟窿山是皆要隘當衝可戰可守未識山西巡
撫已否布置而尤要者則斷不可使入直隸查
懷慶衛輝彰德三府相連彰德之北與直隸順
德府接界今旣將賊匪圍困司馬集惟有聚而
殲旃方保無患若再任其東北紛竄則順德一
警而正定保定皆將動搖矣臣愚以爲用兵之

道必先能戰而後能守近來辦軍務者率以防
堵爲言夫防堵之說可用於鄉邑而不可用於
都會可備於無事之日而不可恃於多事之時
今不圖會勦迎擊而但曰防堵者率皆自分疆
界不顧全局獨不思敢戰尙難於必勝徒守豈
足以自完前奉

諭旨命該大臣等協志同仇併力攻勦得失之機在此

一舉臣尤欲請

旨申諭直隸陝甘各總督河南山東山西各巡撫督率
將弁五路圍攻勿以賊未及此而先懷裹足之
心勿以賊已去此而遂爲息肩之地務當齊心
合力迅掃賊氛庶不負委任之重奏入

上命軍機大臣傳諭訥爾經額哈芬曰現在訥爾經額
所派總兵花里雅遜布董占元等想已與賊接仗托

明阿等何時帶兵渡河恩華是否趕到兵貴神速該大臣務當相機調度迅掃賊氛山西與河南直隸唇齒相依哈芬是否出省如何設法籌勦澤潞爲太行要隘有險可守若能派撥得力將弁帶兵扼要進擊不但自固藩籬並可爲懷慶聲援著該撫迅卽妥籌布置並親督兵勇進剿毋得稍涉延緩

十三日
丙戌李德奏言前因賊匪竄入汜水臣卽

調撥曹縣練勇二百名選派勇頭武生謝國安
帶領隨同河臣長臻先行前往攻勦一面派都
司張遇祥挑帶精兵二百名壯勇二百名卽日
直赴溫縣一帶迎擊臣當偵探賊蹤或須嚴守
北岸或須撥兵應援隨時相機辦理惟昨聞晉
康傳知州縣牌內有五月二十四日自揚州灣
頭拔營前往山東曹河一帶迎擊逆匪等語因

思東省曹河現無逆匪 臣駐紮曹縣帶兵防堵毋庸另調弁兵不如由黃河南岸馳往汴梁省城就近渡黃卽到衛輝較爲迅速奏入

上命軍機大臣傳諭訥爾經額曰本日據李德奏賊由汜水搶船渡河已派兵勇前赴溫縣等處攻擊等語此股渡河賊匪雖爲數無多然不及早剿滅恐裹脅日衆又滋蔓延該大臣務卽督飭花里雅遜布董占

元等迅速進攻毋稍延誤據李德奏稱曹河現無逆
匪慧成之兵無須株守東省該大臣卽行知慧成徑
赴河北一帶有賊處所協同攻剿

同日

上命軍機大臣傳諭向榮許乃釗曰逆匪分股竄擾河
南江西原圖牽掣大軍分我兵力前據張芾奏江西
省城情形危急曾諭湖廣督撫撥兵應援江南軍營

能否撥兵前往並諭向榮酌量緩急辦理原以金陵圍攻正在喫緊且著名首逆俱在城中一分兵他去恐致墮賊奸計該大臣初到金陵時攻剿似尙得手乃迄今未能克復而逆匪已水陸分竄若再遷延觀望防範疏懈致令著名首逆潰圍而出向榮其何以當此重罪近日攻剿情形如何江面上下游艇船是否合力攻剿著該大臣等迅速奏報

同日吏部奏言遵議河東河道總督長臻處分
奏入

上諭內閣曰長臻巡查河口是其專責乃先事未能豫
防至賊已渡河始奏請赴豫修防實屬不知緩急長
臻著改爲降三級留任不准抵銷至太常寺卿王履
謙經朕特派巡查黃河口岸於賊匪偷渡未能防範
亦難辭咎王履謙著降二級留任不准抵銷仍責令

會同該河督嚴密稽查毋稍疏懈

十四日丁亥托明阿奏言自撫臣陸應穀起程回

省後臣等因船隻不敷渡用一面嚴催地方官
並委員等速爲添備船隻一面督催馬步各隊
就現有船十餘隻陸續分起晝夜趕渡六月初
九日夜已渡過河官兵三千餘名其未渡過者
一千餘名業於初十日催令全行渡過北岸擬

卽齊隊速往懷慶府清化鎮一帶偵探賊蹤相機截擊奏入

上命軍機大臣傳諭托明阿勝保長臻陸應穀曰托明阿與善祿西凌阿等現已渡河著卽帶領官兵迅速追剿務將懷慶等處賊匪盡數殲滅該處與山西澤州接壤清化鎮又係繁庶之區太行祇隔一山已偏晉省門戶哈芬雖已派員防堵而兵力尙單儻任賊

匪竄入山內則北達井陘已據直隸之險隘關繫甚重著托明阿等督兵速往截剿萬不可令其竄入太行惟當緊躡賊蹤與晉省防堵官兵前後夾擊至黃河南岸賊匪竄至許州勝保前由鹿邑遄行諒可不起到著仍遵前旨確探賊蹤何路緊要卽由何路進剿務使河南之賊不能搶渡北岸則河北之賊來源截斷剿辦更易得手至河面船隻疊經諭令陸應

穀長臻等飭屬收集而此股賊匪卽係由洛搶船過河北竄儻再不實力防範致令南岸之匪乘閒偷渡朕惟陸應穀長臻是問

十五日戊子訥爾經額奏言臣於初七日行抵磁

州後接據大名鎮董占元稟報探得賊匪現竄懷慶攻撲府城約有三千餘人等語臣當飛飭該鎮馳往迎剿並恐兵力尙單卽添派署正定

鎮雙祿督同遊擊格洪額帶正定秦甯並督標
兵共一千名兼程馳赴懷慶會同董占元分投
勦洗一面檄飭署河北鎮花里雅遜布仍督兵
在延津渡口屯駐副將甘恪修亦帶兵五百名
屯駐獲嘉以爲後路聲援又據該鎮董占元稟
報已由滎澤渡河日內可抵懷慶臣查懷慶與
山西澤州接壤雖經該省派兵防守而撫臣遠

在省垣鞭長莫及誠恐賊匪被勦窮蹙竄入晉地則由澤州至潞安太原處處可通已飛咨該撫臣作速出省在澤潞一帶駐紮力遏賊衝並札飭豫省州縣趕緊豫備車馬以便尙書恩華迅速前進合力勦辦奏入

上命軍機大臣傳諭訥爾經額恩華曰逆匪分股竄擾武陟懷慶現經該大臣添派重兵馳援著卽嚴飭該

鎮將等確探賊蹤合力截勦所有毗連豫省之澤州
潞安各要隘防守尤關緊要並著訥爾經額隨時知
照哈芬協力嚴防勿任餘匪闌入恩華官兵需用車
馬經該大臣飭令各州縣趕緊豫備仍須飛催前進
至該尙書隨營之兵雖祇有一千餘名現在托明阿
所帶官兵四千名已於初十日全數渡河合計董占
元等所帶之兵亦不爲單弱著恩華星速前進會同

托明阿督率河北各路帶兵大員併力追剿務使奔
喘各匪不暇擄掠裹脅則糧食火藥無從接濟定可
一鼓殲除

同日向榮許乃釗奏言竊臣向榮調度無方以
致元惡稽誅堅城久頓撫心慙懼實屬無地自
容茲從各營將弁中擇其尤爲勇敢者各於所
部選擇勁兵得三千二百人臣向榮親與瀝血

誓破此城特爲另紮數營以便隨時出隊六月初二日飭令各營兵明攻朝陽門龍脖子兩處而密派勁兵潛襲太平門查該處賊營三座中通一路僅容一夫來往我兵卽從此路進攻廣西藍翎額外彭得標首先躍入賊壘連斃數賊我兵乘勢魚貫而進直薄城闔該逆於城上拋擲火彈火輒斷我進路而迤城繞出之賊又於

賊營外包抄我兵廣西義勇趙全福見大黃旗下有穿黃馬褂賊目一名指揮賊衆馳往直前砍其首級兵丁楊玉勝等又將執旗之賊砍倒諸賊復向城根逃遁我兵圍攻賊營奮力鏖戰自寅至午始次第撤回殺斃賊匪一百餘人內有大小賊目六名其爲槍礮擊傷者尤不可勝數而我兵陣亡弁兵彭得標蔡世松等九名均

屬奮勇爭先其餘傷亡兵勇四十二名亦皆數
年中從征敢死之士均以勇戰捐軀受傷深爲
可惜臣向榮加意撫恤各兵勇激於義憤無不
踴躍用命復於次夜二鼓潛襲朝陽門城內賊
衆亦有潛出襲我者遂於黑暗中互戰良久殲
賊無數擒獲長髮賊一名餘皆被創入城城上
槍礮矢石如雨我兵遂退還收隊研訊長髮賊

匪據供楊逆以圍久不解擬用火牛衝動大營
先令該逆等前來試探此初二初三晝夜兩次
進攻之大略情形也省城東南北三面防守極
嚴惟旱西水西二門該逆防備較疏因另行躡
覓路徑設法進攻以期得手至鎮江師船前據
署總兵李德麟暨藩司麟桂等稟稱五月二十
四日夜賊用火船四排乘風下駛意欲圍燒我

船後有白篷船十餘隻跟蹤開礮兼施火箭各
艇船連用大礮擊沈賊船數隻白篷船遂紛紛
逃回二十九日東南風起各艇船駛至鎮江瓜
州兩口與賊船接仗三時之久擊沈賊船十餘
隻轟斃賊匪不計其數臣查賊情詭秘萬端若
非設法出奇未易制勝臣等責無旁貸惟有益
加策勵銳意進攻至竄擾皖豫江西各賊無論

由何處分出其首逆旣在省垣總須聽命於此
但得金陵剋期收復渠魁就縛脅從自無能爲
矣奏入

上命軍機大臣傳諭向榮許乃釗曰此次攻倭賊營直
薄城闔兵弁俱奮勇爭先乃進攻兩晝夜總未得手
而敢死之士復多傷亡甚爲可惜至該逆於東南北
三城防守極嚴惟旱西水西二門備禦稍懈該大臣

等業經躡覓路徑擬從西面攻其不備著卽相機布
置毋再疏虞至此次鎮江師船擊沈賊船多隻著向
榮等迅催麟桂李德麟等會齊上下游艇船趕緊肅
清江路則鎮江賊勢自孤至金陵爲大局所關克復
尤不可再遲該大臣旣選擇勁兵瀝血誓破此賊各
將弁自必踴躍用命人思敵愾務期設法迅速收復
二城此次攻城奮勇陣亡弁兵彭得標等著卽查明

請卹以示激勸